

Video nadzor u Starom gradu u Mostaru

Agencija Stari grad Mostar je krajem decembra 2014. godine implementirala I Fazu projekta video nadzora u UNESCO zone Starog grada u Mostaru.

Cilj projekta je zaštita i prezentacija kulturno-istorijskog nasljeđa jezgre Starog grada.

Ovoj implementaciji projekta je prethodila izrada idejnog i glavnog projekta, te izdavanje potrebnih saglasnosti od strane Federalnog Ministarstva prostornog uređenja.

Cjelokupan projekat predviđa postavljanje 15 IP kamera, od čega su predviđene dvije panoramske kamere u HD rezoluciji.

Prva faza projekta omogućila je nadzor nad pet tačaka. Postavljene su četiri fiksne kamere koje pokrivaju područje ispred Hamama i Tabhane, dijela Onežukove ulice – Priješka Arhiva, antička park, te Arhiv i postavku u Agenciji Mostar. Peta kamera je postavljena sa panoramskim mogućnostima i prenosi signal u HD rezoluciji, te pokriva područje Kujundžiluka, i pogleda na Stari most i obale rijeke Neretve sa sjeverne strane.

Sistem prijenosa video signala sa kamera je zbog zaštite UNESCO zone izveden bežičnim putem, a izvođač radova KAMIR d.o.o. morao je koristiti posebne tehnike montaže opreme za maskiranje instalacija, kako se ne bi narušio izgled Starog grada.

Centralno komunikacijsko središte sa video serverom smješteno je u zgradi Agencije Stari grad Mostar, čime su u potpunosti ostvareni preduslovi da se projekat nastavi po potrebi i etapno kako se budu iznalazila sredstva, uključujući i nove kamere u sistem.

Sredstva za izradu projektne dokumentacije i radove u prvoj fazi obezbijedio je Grad Mostar u iznosu od 31.000 KM, dok je Ministarstvo civilnih poslova Bosne i Hercegovine učestvovalo u sufinansiranju projekta sa 13.000 KM.

Ukoliko se dođe do potrebnih sredstava, planirano je da se u toku 2015. godine kadrovi pojedinih kamera postave kao "Live stream" na Internetu u cilju kulturne i turističke promocije grada Mostara.

{gallery}galerija/videonadzor{/gallery}